



JABATAN PERLINDUNGAN HIDUPAN LIAR DAN TAMAN NEGARA (PERHILITAN) SEMENANJUNG MALAYSIA

KENYATAAN MEDIA

MEMPERKUKUH IKATAN PERHILITAN DAN KOMUNITI DALAM MENSEJAHTERAKAN RAKYAT

Jabatan Perlindungan Hidupan Liar dan Taman Negara (PERHILITAN) Semenanjung Malaysia terus memperkukuh hubungan bersama masyarakat melalui pelaksanaan Kampung Angkat MADANI (KAM) dan Sekolah Angkat MADANI (SAM) Tahun 2026.

Majlis Penyerahan Projek KAM dan SAM Jabatan PERHILITAN Tahun 2026 telah disempurnakan oleh YB Menteri Sumber Asli dan Kelestarian Alam (NRES), dengan kehadiran barisan kepimpinan tertinggi NRES dan Jabatan PERHILITAN. Inisiatif ini mencerminkan komitmen bersama dalam memastikan pembangunan komuniti di bawah aspirasi Malaysia MADANI memberi manfaat dan impak secara langsung kepada rakyat.

Bagi tahun 2026, Kampung Basong, Hulu Terengganu dipilih sebagai Kampung Angkat MADANI Jabatan PERHILITAN, manakala Sekolah Kebangsaan Padang Setebu dipilih sebagai Sekolah Angkat MADANI.

Pemilihan Kampung Basong amat signifikan memandangkan hubungan erat antara PERHILITAN dan komuniti setempat telah lama terjalin, khususnya dalam menangani konflik manusia dan hidupan liar, termasuk konflik gajah. Inisiatif KAM ini seterusnya memperkukuh kerjasama tersebut demi keselamatan, kesejahteraan dan kelangsungan hidup masyarakat.

Sebanyak RM500,000 diperuntukkan bagi penambahbaikan kemudahan komuniti di Kampung Basong, meliputi Balai Raya, padang bola, gelanggang serbaguna, kawasan tanah perkuburan dan surau. Selain itu, RM100,000 diperuntukkan bagi penglibatan institusi Pendidikan dan Latihan Teknikal dan Vokasional (TVET), khususnya Kolej Vokasional Wakaf Tembesu, Kuala Terengganu dalam menyokong pelaksanaan projek KAM.

Bagi Sekolah Kebangsaan Padang Setebu pula, sebanyak RM100,000 diperuntukkan untuk kerja penyelenggaraan dan penambahbaikan kemudahan sekolah bagi mewujudkan persekitaran pembelajaran yang lebih selesa, selamat dan kondusif.

Secara keseluruhannya, pelaksanaan KAM, penglibatan TVET dan SAM Jabatan PERHILITAN bagi tahun 2026 melibatkan jumlah peruntukan RM700,000.

Inisiatif ini bukan sekadar pembangunan fizikal, malah menjadi wadah untuk memperkukuh kepercayaan, kebersamaan dan tanggungjawab bersama antara Jabatan PERHILITAN dengan masyarakat dalam

menjamin kesejahteraan komuniti serta memelihara khazanah alam negara.

Jabatan PERHILITAN berharap segala kemudahan yang disediakan dapat dimanfaatkan sepenuhnya oleh komuniti Kampung Basong dan warga Sekolah Kebangsaan Padang Setebu serta menjadi pemangkin kepada pembangunan masyarakat yang lebih sejahtera, mampan dan harmoni.

Kampung Angkat MADANI bukan sekadar sebuah projek pembangunan, tetapi simbol kebersamaan dan komitmen bersama dalam membina masa depan komuniti yang lebih sejahtera.

**JABATAN PERLINDUNGAN HIDUPAN LIAR DAN TAMAN NEGARA
(PERHILITAN) SEMENANJUNG MALAYSIA
5 SEPTEMBER 2026**